



Fasnacht 2019

Rettet dr glai Yysbäär

Dr glai Yysbäär isch bitz druurig.
Är hyylt fescht und grausam schuurig.
Sy Lieblings-Yysbäärg isch nimm doo.
Hett däa dr Klyymawandel gnoo?

“Wäägewaas schmilzt bi uns denn alles wägg?
Daas isch ächt e Riisedrääg!
Ych will jetz emool wisse, wäägewaas daas so isch.
Ych gang uff e Rais und waart nimm am Disch!”

Sait s und stoot uff und nimmt s näggschde Taxi.
D Mamme sait: “Soo schnäll ischer no nie wägg gsii.
Hoffentlig kunnt er gsund haime, meeglisch bald
und weiss, wäägewaas mir warm hänn statt kalt.”

Dr Glai isch underdesse scho in Schwede
und gseet, dass deerte fascht e jeede
e digge Diesel-Schlitte faart,
wo stinggt und raucht und dreent und knaart.
Won äär uss Stockholm uuse kunnt,
kensch en nimm, daas het e Grund.
S wysse Fäll isch drääggig grau
so wie iiberall speeter au.

Wytter goot s uff Dänemark.
Au doo sin d Auti z grooss und z stargg.
Z Dytschland unde wird s no schlimmer:
Raase, nie brämse, aber Gas gää immer.
Groossi Graftwäärgg, wo Koole verbrenne...
De kasch bi dääre Luft kuum penne.

Äär nimmt e Schwumm bis uff Basel im Rhyy.
Doo schmeggt s bitz fescht no Pharmazyy.
Vyyli dien numme ganz still promeniere.
Am Rhyyuufer woone zvyyl, wo regglamiere.
D Faasnacht isch laider noonig graad.
S Ganze dunggt iin bitzli faad.

Drum goot er wytter uff Ziiri. Do stinggt s jo no vyyl mee...
no gwäschenem Gäld und Blaschdig im See.
Schnäll wytter, dänggt er, ych wott in Schnee!
Wyt hinde, ganz oobe het äär e bitz gsee.

Uffem Bäärg oobe gfallt s em, es isch scheen kalt
und s het no bitz Yys im Gletscherspalt.
Äär wanderet ummen und duet s gniesse,
bis e Jeeger kunnt und iin wott schiesse.
Är syg e beese Wolf, e wysse,
wo numme wott go Lämmlu rysse.
D Underschaidig vo Wolf und Bäär
isch fiir däa Jeeger zimli schwäär.
Oft gseen d Jeeger halt nit so guet
und knallen uff alles, wo lääbe duet...

Är findets langsam nimme so fair.
Drum haut är s jetz ab, wyt iibers Meer.
Zem Gligg het en e Grizzly uss Amerika
in syyni Heeli yyglaade ghaa.

“Amerika” haisst fir iin Abentyr und Freyhait.
Är kennt dr Trump nooni, wo alles e glai falsch sait.
Drum griegt er e Schogg, e zimli groosse.
In Sachen Umwäلتschutz goot deert alles in d Hose.
Si Frind fluecht iiber dr komisch Bresidänt,
im Kopf haig er nyt und druff e Berüggen am Änd.
D Auti sin deert noomool greesser und stingge,
d Fabrigge sin gruusig, d Schuld git me de Lingge.
Sy Fäll isch jetz schwarz und nimme nur grau,
ganzi Wälder dien brenne, dr Trump macht ai Schau.

Dr glai Yysbäär dänggt nooch,
är het scho vyyl gleert:
Dr Co2-Ghalt isch z hooch
und d Balance isch gsteert.
Vvvl Lyt luege nur uff s aigene Gäld
und nur ganz weenigi dänggen au an d Wält.

“Wääge de Mensche schmilzt bi uns s Yys!
Daas find ych schon e bitzeli fyys,
und mii duet me wien e Wolf verjaage.
Daas muess ych graad mym Mami saage!”
Är sprintet noordwäärts, so schnäll asses goot.
Nur no voorwäärts! Sunscht wird s vyyl z spoot.

Dr glai Yysbäär het rächt, äär het tscheggt,
was fir e Wurm im Ganze steggt.
Sy Mammen isch froo, won er wiider kunnt,
und loost em zue fir mänggi Stund.
Nur ebbis duet sii nit begryffe:
Wäägewaas het er z Basel nit gwaartet uff s Pfyffe
und Ruessen und Schränzen in dr Stadt?
“D Faasnacht hesch verbasst! Die wäär so glatt!”

Glainen Yysbäär, mer laade dii yy,
wenn wiider doo bisch bi uns am Rhyy.
Kumm mit uns ko Faasnacht mache,
miir hänn zämme sicher vyyl zem lache
und vergässe fir aimool alli Sorge
vom Määntig- bis am Donnschtigmoorge.

Und denn rette mir mit aller Graft
unseri Wält - es isch heggschti Zyt!
Die Alte hänn iiberhaupt nit gschafft,
Aber mir Junge, miir schyttere nit!

Jetz kasch zer PIERROT gheeren und pfyffen oder drummle leere.
Wyteri Usskunft griegsch iiber die eleggdroonische Boschd:

vorstand.jungigarde@pierrotclique.ch

Iebigstunde sin am Zyschtigzoobe im Leonhardgymnasium. Am
Frytig-Noomidaag, 15., und am Samschtig, 16. Meerze dien sich die
Junge Gaarden uff em Barfi voorstelle und hoffen uff vyyl Bsuecher
und Jungi, wo Inträssi hänn. D Ladäärnenuusstellig isch vom
Määntigznacht, em 11., bis am Mittwuchdemoorge, em 12. Meerze,
uff em Minschterblatz. Deert kaa men iibrigens au alli Zeedel und
Schnitzelbängg, d Blaggedden und dr Rädäbängg kaufe. Mer freuen
ys uff dyy Bsuech. De findsch ys au im Internet under

www.pierrotclique.ch